

Cinco luna despues cu Valero a cambia di refineria pa transshipment terminal

San Nicolas ta den un estado hopi depresiona segun SNBA

ORANJESTAD – E estado di San Nicolas ta uno dramáticamente depresiona. Esey ta e forma cu e presidente di San Nicolas Business Association (SNBA), Marcelino Quant ta describi e situacion di San Nicolas actualmente. Presente durante e conferencia di Camara di Comercio riba futuro di Aruba sin refineria ayera, Quant a muestra cu e ta contento di tende e comentario cu tin, pero cu e realidad di e situacion di San

Nicolas ta pesimo.

FACTORNAN IMPORTANTE

Segun Quant, tin hopi factor pakico e situacion ta asina. Un di e factornan ta esun emocional. Hendenan a perde trabou na Valero, y esnan cu tabata eyden ainda, mester a sali afo na maart awor. “E grupo cu a keda aden ta uno masha chikito mes ” Quant a sigui bisa. Esey ta afecta sigur nan cas, nan bisña, omo etc. E ta kita e atencion

pa consumi cos. Na di dos luga, Gobierno en berdad ta haciendo basta obra, manera mehoracion di infraestructura, pero esey no por bay sin cera un caya. “Y esey ta afecta nos atrobe como un di dos elemento” Quant ta sigui bisa.

DI TRES FACTOR

Pa di tres, ta den aña di eleccion y esey ta pone cu e situacion ta bira manera un ‘wait and see’ strategy. Tur hende kier sinta warda wak kico ta bay sosode, y esey ta afecta nan. E actividad economico di San Nicolas a reduci cu 50%, cual ta algo substancial segun Quant. Hopi mas; San Nicolas no por wanta prome cu e ‘shut down’. Ora cu a puntra Quant cuanto mas San Nicolas por wanta, e la bisa simplemente ‘no mucho’. Como tal Quant ta boga pa algo tuma luga aworaki mes. Ta dificil pa mare na un tempo, y ta bisa cu ta papia di algun mas cu 6 luna prome cu algo malo pasa.

CREATIVO

Loke ta sosode na San Nicolas, ta cu hendenan a bira hopi ‘creativo’. Nan a pasa door di



asina hopi dip caba cu nan ta purba yuda nan mes. “Nan ta manera e Chinesnan. No tin e mesun entradanan cu mester pa run un negoshi. Pero esey no por keda asina pa hopi tempo mas” Quant a sigui bisa **BON DIA ARUBA**.

SITUACION DI VALERO
Manera ta conoci dia 15 di april ta cumpli 5 luna cu Valero a cera su porta como refineria, mandando 90% di su trahadonan cas. For di e tempo ey, hopi mester a busca

otro trabou, sea den construccion, hoteleria of esun mas dramático, di bandona nos isla. Hecho ta cu cosnan no ta mescos y e situacion ta biraando mas y mas fastioso. Cu un refineria den un inseguridad (ainda ta buscando benta y ta mantene e speranza pa un solucion), e pregunta pa hopi ta bira, cuanto mas nan tin cu wanta prome cu algo concreto sali afo y cu nan por tin e seguridad cu nan por sali for di e inseguridad aki. □

